

LIGJ
Nr. 49/2021

**PËR DISA SHTESA DHE NDRYSHIME NË LIGJIN NR. 49/2012, “PËR
GJYKATAT ADMINISTRATIVE DHE GJYKIMIN E MOSMARRËVESHJEVE
ADMINISTRATIVE”, TË NDRYSHUAR**

Në mbështetje të neneve 81 dhe 83, pika 1, të Kushtetutës, me propozimin e një deputeti,

KUVENDI
I REPUBLIKËS SË SHQIPËRISË

VENDOSI:

Në ligjin nr. 49/2012, “Për gjykatat administrative dhe gjykimin e mosmarrëveshjeve administrative”, të ndryshuar, bëhen këto shtesa dhe ndryshime:

Neni 1

Në nenin 12 pika 3 ndryshohet si më poshtë:

“3. Kolegji Administrativ i Gjykatës së Lartë gjykon me 3 gjyqtarë të gjitha çështjet, me përjashtim të rekurseve të paraqitura kundër vendimeve të Gjykatës Administrative të Apelit që kanë shqyrtuar paditë ndaj aktit nënligjor normativ, si dhe gjykimeve në seancë gjyqësore për njësimin ose zhvillimin e praktikës gjyqësore, të cilat gjykohen me 5 gjyqtarë.”.

Neni 2

Në nenin 43 pika 2 ndryshohet si më poshtë:

“2. Vendimi për shfuqizimin e aktit nënligjor normativ, pas përfundimit të gjykimit në Gjykatën e Lartë, publikohet i plotë në të njëjtën mënyrë me atë të parashikuar nga legjislacioni në fuqi për botimin e aktit.”.

Neni 3

Në nenin 48 pas pikës 1 shtohet pika 1/1 me këtë përmbajtje:

“1/1. Relatori i çështjes në Gjykatën Administrative të Apelit, kur çmon se të metat e ankimit nuk janë konstatuar nga gjyqtari i vetëm sipas nenit 46 të këtij ligji, me vendim njofton palën për të plotësuar të metat brenda 5 ditëve, duke e informuar për pasojat ligjore në rastin e mosplotësimit të të metave të ankimit brenda afatit të caktuar. Kur të metat e ankimit nuk plotësohen brenda afatit të caktuar, relatori, në dhomë këshillimi, vendos kthimin e ankimit. Kundër vendimit të relatorit të çështjes në Gjykatën Administrative të Apelit për kthimin e ankimit lejohet rekurs i veçantë.”.

Neni 4

Pas nenit 56 shtohet neni 56/a me këtë përmbajtje:

“Neni 56/a
Përmbajtja e rekursit

1. Rekursi duhet të përmbajë:

- a) palët ndërgjyqëse;
 - b) vendimin që kundërshtohet;
 - c) paraqitjen e përmbledhur të fakteve të çështjes;
 - ç) shkaqet për të cilat kërkohet prishja e vendimit, si dhe argumentet që mbështesin pretendimin se ekzistojnë shkaqe për rekurs sipas parashikimeve të nenit 58 të këtij ligji;
 - d) prokurën e avokatit që përfaqëson palën.
2. Rekursi mund të paraqitet në përputhje me formatin e miratuar me vendim të Këshillit të Gjykatës së Lartë.”

Neni 5

Në nenin 57 bëhen ndryshimet e mëposhtme:

1. Në pikën 1 shkronja “b” shfuqizohet.
2. Pika 2 ndryshohet si më poshtë:
“2. Në rast se rekursi nuk plotëson kushtet e parashikuara në pikën 1 të këtij neni, si dhe kur ai nuk është nënshkruar ose nuk është paraqitur në përputhje me nenin 56/a të këtij ligji, gjyqtari i vetëm ose relatori që ka dhënë vendimin njofton palën që të ndreqë të metat brenda 5 ditëve. Shqyrtimi i rekursit sipas këtij neni bëhet në dhomë këshillimi.”.
3. Në pikën 3 fjalia e dytë ndryshohet si më poshtë:
“Kundër vendimit të gjyqtarit për kthimin e rekursit mund të bëhet rekurs i veçantë.”.

Neni 6

Në nenin 60 bëhen këto shtesa dhe ndryshime:

1. Pika 1 ndryshohet si më poshtë:
“1. Gjykata administrative, që ka dhënë vendimin e kundërshtuar, dërgon rekursin së bashku me aktet që i bashkëlidhen atij, vendimin e gjyqtarit ose relatorit për pranimin e rekursit, aktet e komunikimit të rekursit, kundërrekursin, si dhe dosjen e gjykimit në Gjykatën e Lartë brenda 10 ditëve nga data e përfundimit të komunikimeve.”.
2. Pas pikës 1 shtohet pika 1/1 me këtë përmbajtje:
“1/1. Kur të metat e rekursit nuk janë konstatuar nga gjykata më e ulët, relatori i çështjes në Gjykatën e Lartë me vendim njofton palën për të plotësuar të metat brenda 5 ditëve. Kur të metat e rekursit nuk plotësohen brenda afatit të caktuar, relatori, në dhomë këshillimi, vendos kthimin e rekursit. Kundër vendimit të relatorit të çështjes në Gjykatën e Lartë për kthimin e rekursit nuk lejohet ankim.”.
3. Në fund të pikës 2 shtohet fjalia me këtë përmbajtje:
“Ky afat është 45 ditë kur rekursi është paraqitur ndaj një vendimi të Gjykatës Administrative të Apelit lidhur me gjykimin e aktit nënligjor normativ.”.

Neni 7

Neni 60/1 shfuqizohet.

Neni 8

Në nenin 61, pika 2, numri “21” zëvendësohet me numrin “15”.

Neni 9

Në nenin 62, pika 1, shkronjat “b” dhe “c” ndryshohen si më poshtë:

“b) çështja paraqet rëndësi nga pikëpamja e së drejtës për njësimin ose zhvillimin e praktikës gjyqësore.

c) vlerësohet e nevojshme nga Kolegji Administrativ thirrja dhe dëgjimi i palëve për shkak të problematikës ose kompleksitetit të çështjes, në rastet e përcaktuar në shkronjat “b” dhe “c” të nenit 58 të këtij ligji.”.

Neni 10

Pas nenit 62 shtohet neni 62/a me këtë përmbajtje:

“Neni 62/a

Njësimi dhe ndryshimi i praktikës gjyqësore

1. Kolegji Administrativ, kryesisht ose me kërkesë të palëve, mund të vendosë nisjen e procedurës së gjykimit për të njësuar ose ndryshuar praktikën gjyqësore. Nisja e procedurës për ndryshimin e praktikës gjyqësore mund të vendoset edhe nga Kryetari i Gjykatës së Lartë.

2. Vendimi i ndërmjetëm i Kolegjit Administrativ për kalimin e çështjes në seancë gjyqësore, përcakton çështjet e shtruara për njësimit ose praktikën gjyqësore të njësuar që duhet ndryshuar dhe publikohet menjëherë pas arsyetimit në faqen elektronike të Gjykatës së Lartë.

3. Gjykimi për njësimin e praktikës gjyqësore bëhet nga Kolegji Administrativ me trupë gjyqësore prej 5 gjyqtarësh, në të cilën marrin pjesë trupa gjyqësore që po gjykon rekursin dhe dy gjyqtarë të tjerë të kolegjit, të caktuar me short.

4. Gjykimi për ndryshimin e praktikës gjyqësore të njësuar bëhet nga Kolegjet e Bashkuara të Gjykatës së Lartë. Kryetari i Gjykatës së Lartë, si kryesues i Kolegjeve të Bashkuara, cakton datën dhe orën e gjykimit të çështjes për ndryshimin e praktikës gjyqësore. Kolegjet e Bashkuara gjykojnë sipas rregullave të caktuara për kolegjin kur marrin pjesë jo më pak se dy të tretat e të gjithë anëtarëve të Gjykatës së Lartë.

5. Data dhe ora e seancës gjyqësore u njoftohen palëve nga sekretaria gjyqësore sipas rregullave të përgjithshme të njoftimit të paktën 15 ditë përpara datës së zhvillimit të seancës.

6. Kolegji Administrativ ose Kolegjet e Bashkuara, kryesisht ose me kërkesë të palëve, mund të vendosin ndryshimin e çështjeve të shtruara për njësimit ose ndryshim të praktikës gjyqësore. Ky vendim i ndërmjetëm publikohet në faqen elektronike të Gjykatës së Lartë.

7. Përveç rasteve kur ligji parashikon ndryshe, për shkak të interesit që paraqet njësimi ose ndryshimi i praktikës gjyqësore në këto gjykime, kur është rasti, Gjykata e Lartë mund të kërkojë mendimin me shkrim nga Avokatura e Shtetit, si dhe nga persona juridikë publikë ose privatë që çmohet se kanë njohuri të posaçme për çështjet ligjore të shtruara për njësimit ose ndryshim të praktikës gjyqësore. Gjykata e Lartë, në kërkesën për paraqitjen e mendimit me shkrim, cakton një afat brenda të cilit mund të paraqitet mendimi, i cili në çdo rast nuk mund të jetë më i shkurtër se 14 ditë. Mendimet me shkrim nuk janë detyruese dhe publikohen në faqen elektronike të Gjykatës së Lartë.

8. Vendimi i Kolegjit Administrativ dhe Kolegjeve të Bashkuara është i detyrueshëm për gjykatat në gjykimin e çështjeve të ngjashme.”.

Neni 11

Neni 63 ndryshohet si më poshtë:

“Neni 63

Vendimet e Gjykatës së Lartë

1. Pas shqyrtimit të çështjes Kolegji Administrativ ose Kolegjet e Bashkuara të Gjykatës së Lartë vendosin:

a) mospranimin e rekursit në rastet kur është bërë për shkaqe të ndryshme nga ato që parashikon neni 58 i këtij ligji;

b) prishjen e vendimit të Gjykatës Administrative të Apelit dhe lënien në fuqi të vendimit të gjykatës administrative të shkallës së parë;

c) prishjen e vendimit të Gjykatës Administrative të Apelit dhe dërgimin e çështjes për rishqyrtim në këtë gjykatë me tjetër trup gjykues;

ç) prishjen e vendimeve të Gjykatës Administrative të Apelit dhe të gjykatës administrative të shkallës së parë dhe dërgimin e çështjes për rigjykim në shkallë të parë kur vendimi jopërfundimtar i gjykatës së shkallës së parë është marrë në kundërshtim me ligjin dhe kjo shkelje nuk është konstatuar nga Gjykata Administrative e Apelit;

d) prishjen e vendimeve të Gjykatës Administrative të Apelit e të gjykatës administrative të shkallës së parë dhe pushimin e gjykitimit të çështjes pa e kthyer për rishqyrtim;

dh) ndryshimin e vendimeve të Gjykatës Administrative të Apelit dhe të gjykatës administrative të shkallës së parë dhe zgjidhjen e çështjes në themel kur zbatimi i ligjit procedural apo material nuk diktohet nga nevoja për rivlerësimin e fakteve apo të provave të çështjes;

e) lënien në fuqi të vendimit të Gjykatës Administrative të Apelit.

2. Në rastet kur Kolegji Administrativ ose Kolegjet e Bashkuara të Gjykatës së Lartë vendosin njësimin ose ndryshimin e praktikës gjyqësore, në vendim gjykata formulon edhe rregullin e së drejtës për çdo çështje të shtruar për zgjidhje në vendimin e ndërmjetëm të marrë gjatë gjykitimit të çështjes. Në këtë rast, vendimi botohet në Fletoren Zyrtare.

Neni 12

Dispozitë kalimtare

1. Përbërja e trupave gjykues, si dhe procedura e gjykitimit në Gjykatën e Lartë rregullohet sipas përcaktimeve të këtij ligji, pavarësisht parashikimeve të ndryshme në ligje të tjera.

2. Rekursitet e paraqitura, por ende të pashqyrtuara, konsiderohen të pranueshme nëse plotësojnë parashikimet e ligjit në fuqi në kohën e depozitimit të tyre.

Neni 13

Ky ligj hyn në fuqi 15 ditë pas botimit në Fletoren Zyrtare.

KRYETAR
Gramoz Ruçi

Miratuar në datën 23.3.2021.